



EDITORIAL

Sipapasnek a paayen ti naranggas nga Oplan Kapayapaan

Idi 2017, napnuan kinapangas nga indeklara ni Rodrigo Duterte ken ti Armed Forces of the Philippines (AFP) a naan-anay a parmeken da ti Bagong Hukbong Bayan (BHB) iti 2018 iti uneg ti Oplan Kapayapaan. Mas ambisyoso daytoy nu iyarig iti a napaay a deklarasyon a “pagbalinen nga awan serbi ti BHB” iti uneg ti Oplan Bayanihan (2011-2016) ti napalabas a rehimen nga Aquino.

Kas ti amin a napalabas a kontra-rebolusyonaryo a manangikuspil a gubat manipud pay idi panawen ni Marcos, mapaay met ni Duterte ken ti Oplan Kapayapaan a magun-od ti indeklara na nga ambisyon na. Ti tarigagay ti umili para iti nainkalinteg a gimong, pudno a demokrasya ken nalian a wayawaya ket saan a maparmek aniaman ti kinainget ti armado a kinaranggas ni Duterte tapno salakniban ti interes dagiti manangidadanes ken mananggundaway.

Gapu iti desperasyon a parmeken ti armado a pannakilaban ti umili a Pilipino, pinakaro ni Duterte ti kontra-

rebolusyonaryo a gyera babaen ti panangusar ti sibubukel nga armado a makinarya ti estado. Us-usaren ni Duterte ken ti AFP ti taktika ti nalawa a panangsakop kadagiti barangay iti kaaw-awayan para iti pamutbuteng ken panangpuersa iti umili. Panggep na a parmeken ti dangadang ti masa a mannalon ken dagiti minorya nga umili para iti daga, ilukat ti dalan para iti interes ti dadakkel a korporasyon iti panagminas ken dagiti plantasyon, lappedan ti pannakilaok ti masa iti armado a dangadang ken panangsuporta iti hukbong bayan.

“Oplan Kapayapaan...,” sundan sa pahina 2

Kabukbukel a batalyon, binira ti BHB-Isabela

BINIRA TI Bagong Hukbong Bayan-Central Isabela (Reynaldo Piñon Command wanno RPC) ti 95th IB, maysa kadagiti kabukbukel a batalyon ti BHB nga adda iti uneg ti 5th ID.

Dimmanon iti 12 ti natay ken tallo ti nasugatan idi inambus dagiti Nalab-baga a mannakigubat ti maysa a platun ti 95th IB idiy Barangay Sindon Bayabo, Ilagan City idi Agosto 16, alas-5 ti agsapa. Maysa kadagiti natay ni Sgt. Junie Iyadan. Maysa nga R4 assault rifle ken 10 magasin ti nasamsam ti BHB manipud iti ambush. Kas bales, nagpabanto ti bomba ken nagistraping ti AFP manipud iti dua a helikopter. Nangipaay daytoy

“95th IB...,” sundan sa pahina 4

Mainaig ditoy, kadagiti lugar a kangrunaan a kunkonsentraan ti AFP, agirusrusuat kadagiti operasyon a dumog wenno dagiti "focused military operation" nga agar-aramat ti adayo nga ad-adu a puersa laban kadagiti yunit ti BHB. Adda dagiti operasyon a maidirdireksyon iti tukad ti dibisyon wenno *area command* ken mangpatpatignay ti kadakkel batalyon a pangmaniobra a puersa tapno isina ken kubkoban ti yunit wenno dagiti yunit ti BHB iti lugar. Agar-aramat kadagiti *drone* para iti surbelans. Agus-usar daytoy kadagiti helikopter, agitintinnag ti bomba ken *rocket* ken mangkankanyon tapno kigtoten ti umili.

Iti panggep a sakopen ti amin a larangan a gerilya ken erya a saklaw ti teritoryo wenno tigtignayan ti rebolusyonaryo a tignayan, ikamkamakam ni Duterte a padakkelen pay ti AFP. Nagbukel ti AFP ti 10 a baro a batalyon para iti kabuklan a 97 a batalyon. Panggep na a makarekrut ti 15,000 a soldado agingga

ti panagleppas ti tawen ken pangaw-awis ti kari a nayon ti sueldo. Agap-apura ni Duterte a makaala kadagiti baro nga armas manipud US ken dadduma pay a pagilian. Umut-utang tapno makagatang kadagiti nayon a paltog, bala, helikopter, dagiti *rocket*, bomba ken dadduma pay nga armas.

Iti bangir ti panangpairteng ti todo-gyera, awan sabali a pagbaganan ti panggep ni Duterte ken ti AFP a parmeken ti rebolusyonaryo nga armado a pannakilaban no di ti naan-anay a pannakapaay.

Nabinbennat ti puersa ti AFP. Nakapakat idia Mindanao ti 75 a batalyon, 34 kadagiti erya ti Moro ken 41 kontra iti BHB. Iti kasta, ad-da 20-25 batalyon laeng ti nakapakat iti Luzon ken Visayas a mangmangted iti BHB kadagitoy a rehiyon ti nalawa a pagmaniobraan, makapagalawa ken makapagpapigsa.

Uray kadagiti maisaysayangkat nga operasyon a dumog iti sumagmamano a rehiyon idia Mindanao, kabaellan laeng ti AFP a mangikonsentra ti maysa a batalyon kadagiti tropa a pangmaniobra tapno sako-





pen ti aginnasideg a bilang dagiti baryo iti uneg ti sumagmamano a lawas. Ti dadduma a tropa na a pangkombat ket saggaysa nga iskwad a nakawaras kadagiti baryo a saklaw dagiti larangan a gerilya ti BHB nu sadino ket bulnerable iti anihilasyon dagiti platun ti BHB. Ad-adu pay a baryo ti awan presensya ti AFP—mangpaneknek a saan da a kabaellan a sakopen ti amin a baryo iti amin a panawen.

Nakaron a mabambannog dagiti opisyal ken tropa ti AFP iti panagalis-alis ken awan-sarday nga operasyon kadagiti larangan a kanayon met a mapaay.

Mabang-bankrupt ti gubyrno ni Duterte. Dimmanonen ti nasurok 30% ti depisit (pagkurangan) ti pondo na iti daytoy Enero-Hulyo. Tapno gumatang kadagiti baro nga armas, ad-adda nga ilumlom na ti utang ti pagilian. Mainaig iti pondo ken pulitika, saan na a kabaellan nga inaldaw a mangkanyon wenno patayaben dagiti helikopter tapno agitinnag ti bomba. Nayon ditoy, nasaknap ti korapsyon ti militar. Agim-imbento ti listaan dagiti "surrenderee" dagiti opisyal tapno maibulsa ti pondo iti "integrasyon." Kiskissayan da uray ti pondo para iti operasyon dagiti tropa da.

Iti estratehiko a panagkita, awan serbi ti panangusar ni Duterte ken ti AFP kadagiti moderno nga armas. Saan a kabaellan dagiti bomba ken *rocket* a patagen dagiti bantay wenno parmeken dagiti yunit ti BHB a nasanay iti panangusar kadagiti taktika a gerilya ken manglaklak-am ti nauneg ken nalawa a suporta ti masa.

Mapaay ni Duterte iti ambisyon na a parmeken ti BHB gaputa nakaro a maisinsina iti umili a Pilipino. Kabayatan a kumarkaro ti kinaulpit ken kinaraggas ti armado a pangikuspil, ad-adda nga idurduron na ti umili nga agarmas ken lumaban. Babaen ti Oplan Kapayapaan, agsusumbangir dagiti panaglabsing iti karbengan-tao. Inaldaw ket rinibu nga umili ti kigigtoten, pilpiliten ken pangpangtaan dagiti pasista a

 <p>Tomong XLIX Blg. 17 Setyembre 7, 2018</p> <p>Ang <i>Ang Bayan</i> ay inilalabas sa wikang Pilipino, Bisaya, Iloco, Hiligaynon, Waray at Ingles.</p> <p>Tumatanggap ang <i>Ang Bayan</i> ng mga kontribusyon sa anyo ng mga artikulo at balita. Hinihikayat din ang mga mambabasa na magpaabot ng mga puna at rekomendasyon sa ikauunlad ng ating pahayagan.</p> <p>  instagram.com/sine.proletaryo  @prwc_info  fb.com/groups/cppinformationbureau  cppinformationbureau@gmail.com </p>	<h2 style="text-align: center;">Nilalaman</h2> <p>Editorial: Sipapasnek a paayen ti nangranggas nga Oplan Kapayapaan 1</p> <p>95th IB dinisnog ti BHB 1</p> <p>2 Operasyon ti Minasan, Pinaralisa 4</p> <p>10 M16, klining manipud iti Lapinig 5</p> <p>Panagbomba idia Mindanao 5</p> <p>Kumarkaro a krisis ekonomya 6</p> <p>Ibasura ti OLBARRM—MRLO 7</p> <p>Martsa dagiti mangmanged 8</p> <p>Pagbawi ng lupang ninuno 8</p> <p>Panangdidigra dagiti militar ken pulis 9</p> <p>Krisis iti bagas ken taraon 11</p> <p>Masaker sa India 12</p> <p>Pagbubuklod sa Colombia 13</p>
<p>Ang <i>Ang Bayan</i> ay inilalathala dalawang beses bawat buwan ng Komite Sentral ng Partido Komunista ng Pilipinas</p>	

soldado a mangsaksakop kadagiti barangay da.

Ab-abusuen dagiti opisyal ti AFP ti bileg da iti arbitraryo a panangbukel kadagiti listaan dagiti tao a masapul nga agpa-“clear” ken panangpilit kadakuada a “sumuren-der” uray awan ti ebidensya nga isuda ket kameng ti BHB. Awan ti pormal a kaso a maidarum iti korte. Adu dagiti maal-allilaw nga uma-tendar kadagiti taripnong tapno kano mangted ti pondo wenno serbisyo nga iti udi na ket paruaren iti midya nga “NPA surrenderee.”

Nasuroken a kagudua ti tawen, awan pay maipakita ti AFP a mayor a balligi na iti uneg ti Oplan Kapayapaan. Ti laeng maipannakel ti AFP ket ti ibagbaga na a nasurok 4,000 a “simmuko” a ti kinapudno na ket dagiti biktima ti nakaro a panangkigkigtot ken panangranggas ti AFP. Masansan nga adda dagiti ideklara ti militar a “development ready area” ngem paulit-ulit met a paneknekan ti BHB ti kinapalso daytoy babaen iti taktikal nga opensiba nga isaysayangkat ti BHB iti lugar.

Kinapudno na, agtultuloy a mangiisaysayangkat ti BHB ti umad-adu a taktikal nga opensiba. Maibilang ditoy dagiti insayangkat ti BHB iti napalabas idiy Luzon ken Visayas kas idiy Ilocos Sur, Isabela, Mt. Province, Rizal, Quezon, Batangas, Albay, Masbate, Northern Samar, Capiz ken Iloilo.

Iti laksid ti panangipakat ti agarup 50% ti tropa daytoy laban iti BHB idiy Mindanao, agtultuloy a makaisaysayangkat ti BHB kadagiti taktikal nga opensiba ken dadduma pay nga aksyon iti lima a rehiyon idiy Mindanao. Agtultuloy a maipatpatungpal dagiti linteg ken annuroten ti demokratiko a gubyerno ti umili mainaig iti ekonomya, aglawlaw ken dadduma pay.

Kadagiti masungad a bulan, ti umad-adu ken dumakdakkal a taktikal nga opensiba ti BHB iti intero a pagilian ket sigurado a mangbennat kadagiti puersa ti AFP.

Iti panangidaulo ti Partido, naan-anay a paayen ti BHB ti Oplan

Kapayapaan ni Duterte iti daytoy a tawen. Maaramid ti BHB daytoy babaen ti panangsurot ti linya ti nasaknap ken nairteng a pannakigubat a gerilya basar iti lumawlaw ken umun-uneg a base a masa.

Rumbeng nga agpursige ken nakasagana iti rigat ken sakripisyo ti amin a Nalabaga a kumander ken mannakigubat ti BHB iti sango ti kontra rebolusyonaryo a kinaranggas ti gyera ni Duterte. Rumbeng a nangato ti panggeddeng a palaban tapno lappedan ti dakes a gandat ti kabusor iti amin a tukad, panawen ken gundaway.

Napasnek a papigsaen ti Partido iti uneg ken amin a tukad ti BHB. Rumbeng a nairut nga idauloan ti Partido ti BHB iti amin a beneg a panangipatungpal na kadagiti trabaho a militar ken pulitika. Ad-adda a papigsaen ti BHB. Agtultuloy nga agrekrut ken agsanay kadagiti baro a Nalabaga a mannakigubat.

Iti amin a panawen ket alaen ti inisyatiba ken paayen dagiti opensiba ti kabusor. Agtultuloy a padur-asen ti kinalaing iti panangipakat kadagiti taktika a gerilya, panangkonsentra ken panangiwaras, nupartak a panagalis, panangusar ti panangallilaw tapno padanogen ti angin ti kabusor ken biraen ti narasay a nakawaras a puersa na.

Napasnek a subaybayan ken adalen dagiti plano nga opensiba ti kabusor iti tukad ti dibisyon ken brigada. Nainget a buklen dagiti taktika, plano ken koordinasyon iti tukad rehiyon ken subrehiyon. Rumbeng a nairut nga ipatungpal ti amin a yunit ti BHB dagiti rebbengen da iti balangkas ti pangkabuklan a plano.

Isayangkat dagiti taktikal nga opensiba iti intero a pagilian nga adaan husto a balanse dagiti operasyon a pannusa ken anihilatibo. Ikkan ti atensyon dagiti opensiba nga addaan panggep a makasamsam kadagiti armas manipud iti kabusor.

Rumbeng nga ipursige a pakawatan, organisaen ken patignayen ti BHB ti minilmilyon a masa a manalon ken dagiti minorya nga umili ken pairtengen dagiti antipyudal

ken dadduma pay a pang-ekonomya a dangadang tapno padur-asen ti pagbiagan nangruna iti sango ti krisis. Ingato ti anti-imperialista a pannakaawat babaen ti panangibuktak iti interes ti dadakkal a kapitalista a gangannaet a mangibadbaddek iti pagimbagan da. Aktibo a patignayen ti masa a manalon a lumaok iti gubat ti umili.

Napasnek nga iyabante dagiti dangadang nga anti-pasista. Iti kaaw-awayan, natibker a labanan ti panangsakop ti militar kadagiti komunidad. Labanan ti kampanya ti panangkigkigtot, pamutbuteng ken panangpilit kadagiti masa a manalon a “sumuko.” Agkaykaysa nga agtignay laban iti “surrender list” ti AFP a ti kinapudno na ket listaan ti panangikuspil wenno likidasyon ti AFP, banag a maikontra iti ikedkeddeng ti internasyunal a linteg a mangmangted proteksyon kadagiti sibilyan, ken ilegal uray iti uneg ti reaksyonaryo a linteg. Ikagumaan ti naregregta a panangiyabante kadagiti dangadang a pang-ekonomya iti panawen ti militarisasyon, irupir dagiti lehitimo a kiddaw ken isilpo iti anti-pasista a pannakilaban.

Iti syudad, kagiddan ti panangiyabante ti nadumaduma a sektor kadagiti dangadang a demokratiko, aktibo nga ibutaktak ti pasista a panangdidigra iti kaaw-awayan, nangruna ti armado a panangikuspil ken pananglipit laban kadagiti sibilyan. Pagallangoganen ti pukkaw tapno gibusan ti linteg militar idiy Mindanao ken turay militar iti intero a pagilian.

Ipakita a husto ken nainkalintegan ti armado a pannakilaban ti masa tapno salakniban ti daga ken iyabante ti pagimbagan da. Lalo a papartaken ti panagrekrut kadagiti mangmangged kasta met dagiti estudyante ken dadduma pay nga intelektual ken demokratiko a sektor para iti BHB.

Naan-anay a palawaen ti panagkaykaysa laban iti pasismo ken tiranya ni Duterte. Patignayen ti sibubukel nga umili tapno rippuogen ti rehimen na.

iti nakaro a buteng ken dadael iti kabiagan ti umili. Dua a nuang ti natay.

Sakbay daytoy, dinisarmaan dagiti Nalabbaga a mannakigubat dagiti kameng ti Task Force Kalikasan (TFK) idia y Sindon Highway ti nasao a barangay idi Agosto 14, alas-9 ti rabii. Ti TFK ti mangiyun-una iti panagtarikayo ken manggungundaway kadagiti rekursu iti kabambantayan ti Sierra Madre. Agkumpiskar dagiti tao na iti troso tapno ilako ken agnumar iti pastrek manipud ditoy. Mangkikil da met laeng kadagiti tiliwen da a babassit nga agtroso iti balor ti P2,000 kada byahe ken P10,000 met kadagiti aguw-uway.

Inarestar met laeng ti BHB-Central Isabela ni PO2 Danilo Maur iti nasao a kalsada bayat a mangibibiyahe ti 3,000 board feet ti ilegal a troso idi Agosto 11, alas-11 ti rabii. Ni Maur ket aktibo nga ahente iti paniktik. Ususaren na kas prente ti panagtari-kayo ken panaglako tapno agtiktik kadagiti teritoryo ti gubyerno ti umili. Malaksid ditoy, nalatak nga agkikil iti dadduma nga agtarikayo ken aguw-uway. Nasamsam kenkuana ti maysa a pistola nga .45.

Naideklara ni Maur a POW weno *prisoner of war* bayat ti panangimbestiga kadagiti krimen na iti umili. Kalpasan ti tallo-al-daw nga imbestigasyon ket nawayaan isuna. Boluntaryo a nagkari isuna nga isardeng ti panangtiktik iti umili ken dagiti kriminal nga aktibidad na. Idi Agosto 12 ti alas-2 ti malem a naipasa isuna iti pamilya na.

Kabayatanna, nagirussuat met laeng dagiti yunit ti BHB ti armado nga aksyon iti nadumaduma a paset ti pagilian.

Ilocos Sur. Rinaut ti BHB-Ilocos Sur (Alfredo Cesar Jr Command weno ACC) ti hedkwarters ti 81st IB idia y Barangay Bugbuga, Sta. Cruz idi rabii ti Agosto 9. Segun iti pablaak

Operasyon ti dua a kumpanya ti minas, pinaralisa ti BHB

PINARALISA NG BAGONG Hukbong Bayan (BHB) ang mapangwasak na mga operasyon ng dalawang malaking kumpanya sa pagmimina noong Agosto sa mga bayan ng Las Nieves, Agusan del Norte at San Mateo, Rizal.

Maysa a *dredger* (barko nga usar iti panagminas ti black sand ken dadduma pay a mineral iti Agusan River) ti pinuoran ti maysa a yunit ti BHB idia y Purok 1-B, Barangay Lingayao, Las Nieves idi Agosto 24 ti rabii. Sinnerrek dagiti Nalabbaga a mannakigubat ti *dredger* nga adda iti igid ti baybay. Pinababa da ti uppat a tripulante maibilang ti kapitan ti *dredger*. Dinisarmaan da ti maysa a guardia a nakaig-gem ti *shotgun* sakbay a pinuoran ti barko.

Kukua ti Ark Green Resources Corporation ti nasao a *dredger*. Dadaelen ti operasyon daytoy ti Agusan River. Agprosproseso met laeng daytoy a kumpanya ti rugit manipud iti panagminas nga agsubli iti Agusan River.

Kabayatanna, pinaralisa ti BHB-Rizal idi Agosto 12 ti makinarya ti Monte Rock Corporation, maysa a kumpanya ti *quarry*, a

paset iti manangdadael a panagminas idia y Barangay Guitnang Bayan, San Mateo, Rizal.

Segun iti BHB-Rizal, ti dua nga oras a panagreyd ket aksyon a panagdusa laban iti kumpanya a manu a tawen nga agminminas ti bato iti kabambantayan a paset ti Rizal. Dagiti operasyon na ket nagresulta iti nalawa a panaglayus saan laeng iti San Mateo no di ket kadagiti ili ti Marikina ken Metro Manila met laeng. Insayangkat ti reyde kalpasan ti nalawa a panaglayus idia y San Mateo gapu iti Bagyo a Karding.

Dinadael ti BHB ti walo a *dumptruck*, dua a *bulldozer*, dua a *payloader*, uppat a *backhoe*, uppat a *van* ken dagiti ramit iti opisina. Dinisarmaan da met laeng dagiti guardia ti kumpanya. Nasamsam da met ti dua a *shotgun*, tallo a paltog a kalibre .38 ken lima a radyo a pangkomunikasyon. AB

ni Saniata Maglaya, tagapagsarita ti ACC, maysa nga upisyal ti natay ken maysa a soldado ti sugatan.

Kuna ni Maglaya, ti 81st IB ket nalatak iti panagabusu kadagiti sibilyan bayat nga agiyar-aramid ti "community support program". Agserserbi da met laeng kas guardia ti proyekto a *hydropower dam* idia y ili ti Salcedo. Segun mismo iti tagapagsarita ti 81st IB, malaksid kadagiti natay ken nasugatan, nadadael met ti kuarto dagiti upisyal, administratibo nga upisina ken maysa a lugan.

Masbate. Idi Agosto 24, banda alas-7:45 ti agsapa, inambus

dagiti Nalabbaga a mannakigubat ti BHB-Masbate (Jose Rapsing Command) dagiti pulis iti maysa a lugan a pangpatrulya idia y Crossing Biyong, Masbate City. Nag-gapu dagitoy a pulis iti detatsment da idia y Barangay Bayombon idi mapasabugan da ti *command-detonated explosive* (CDX) ken pinaputokan ti BHB. Uppat a pulis ti sugatan, maibilang ni SPO2 Ariel Espiel.

Rizal. Nakaro a nasugatan ti dua nga elemento ti 80th IB idi pasabugan ti BHB-Rizal ti CDX ti nagluganan da a trak idia y Sitio Tanza 2, San Jose, Antipolo City idi Hulyo 30, alas-9:30 ti agsapa.

"95th IB...", sundan sa pahina 5

Inisnaysay met ti maysa pay a yunit ti BHB-Rizal idi Hulyo 28 dagiti agop-operasyon a tropa ti 59th IB idia Barangay Sta. Inez, Tanay, Rizal. Maysa a soldado ti natay.

Quezon. Pinaputokan ti maysa a yunit ti BHB-Quezon ti kadakkel-kumpanya a tropa ti 80th IB idia Sityo Sari, Barangay Lumutan, General Nakar idi Agosto 13. Dua a soldado ti natay ken dua ti nasugatan.

Kamaleman ti daydiay nga aldaw, napatay ti maysa nga elemento ti 1st IB idi inisnaysay ti maysa pay a yunit ti BHB-Quezon idia Barangay Cagsiay II, Mauban. Ti yunit ti nasao a soldado ket agserserbi kas protektor ti Marcbuilt Construction. Ti Marcbuilt ket maysa kadagiti kumpanya a mangag-agaw iti daga dagiti mannalon idia Laguna ken Quezon.

Capiz. Uppat a soldado ti 61st IB ti nasugatan idi nagharas ti maysa a yunit ti BHB-Central Panay (Jose Percival Estocada Jr) idia Sityo Naatip, Barangay Lahug idi Agosto 26. Iyar-aramid ti 17-katao a yunit ti 61st IB ti operasyon a kombatan idi mapasabugan da ti CDX iti banda alas-7:00 ti rabii.

Iloilo. Tallo a pulis ti nasugatan idi inambus ti maysa a yunit ti BHB-Southern Front (Napoleon Tumagtang Command) ti 1st Provincial Mobile Force Company ti Iloilo Police Provincial Office idi Agosto 24. Agiyar-aramid dagiti pulis ti kombatan idi mapasabugan da idia Barangay Isian, Victoria ti ili ti Leon iti banda alas-6:20 ti agsapa.

Maibilang kadagiti sugatan ni Chief Inspector Abner Jordan a dadaulo ti nasao a yunit.

Compostela Valley. Inambus ti maysa a yunit ti BHB-Compostela Valley dagiti agpatpatrulya a tropa ti 46th IB idia Manangkol, Golden Valley iti ili ti Mabini. Tallo a soldado ti natay. AB

10 M16, nasamsam manipud iti PNP-Lapinig

SANGPULO A RIPLE nga M-16, dua a pistola .9mm, sangaribu a bala ti M16 ken 49 a magasin ti nasamsam ti Bagong Hukbong Bayan-Northern Samar (Rodante Urtal Command wenna RUC) iti naballigi a reyd iti istasyon ti pulis idia Lapinig idi Agosto 10. Nakumpiskar met dagiti Nalabbaga a mannakigubat ti telescope, tallo a *laptop computer* ken napatag a dokumento.

Iti pablaak nga inruar ti RUC idi Agosto 12, inbaga na a maysa a nadagsen a danog para iti rehimen nga US-Duterte ti nasao a reyd iti istasyon aglalo ta agserserbi daytoy kas salaknib ti ilegal a droga idia Northern Samar.

Segun kenni Ka Amado Pesante, tagapagsarita ti RUC, kabayaan a pagbalbalinen a maysa a "killing machine" wenna makinarya iti pampapatay ti Philippine National Police (PNP) iti ipokrito a kampanya nga Oplan Tokhang ti rehimen, karaman dagiti pulis iti negosyo ti ilegal a droga iti adu nga ili ken probinsya.

Nausar ti maysa a *dumptruck* iti panangreyd dagiti Nalabbaga a hukbo iti headquarters dagiti pulis. Lima a minuto a nakipinnaltog dagiti pulis sakbay a simmuko. Dua a pulis ti nasugatan. Idi pay

laeng napalabas a tawen a naala ti BHB ti impormasyon manipud kadagiti nakurapay a mannalon kasilpo iti pannakairaman dagiti PNP iti ilegal a droga. Nayon pay ti RUC, ar-aramiden ti PNP kas pamarang ti Oplan Tokhang tapno puerasaan nga agpasurender kadagiti sibilyan kas kameng ti BHB.

Naiyulat met ti RUC iti dadduma pay a pablaak daytoy idi Setyembre 2 ti pito nga aksyon militar nga insayangkat na manipud iti Mayo inggana Hunyo laban kadagiti soldado ti 803rd IBde. Lima kadagiti opensiba daytoy ket naiyaramid idia Silvino Lobos, ken saggaysa idia Las Navas ken Lope de Vega. Saan a bumaba ti kaswalti ti kabusor iti walo, ken naakaala ti RUC kadagiti bala ti M60 ken M16. AB

Panagbomba idia Mindanao, maus-usar para iti linteg militar

KINUNDENAR TI PARTIDO Komunista ti Pilipinas dagiti panagbomba idia Isulan, Sultan Kudarat idi Agosto 28 ken Setyembre 2 no sadino ket saan a bumaba iti uppat ti natay ken agarup 50 a sibilyan ti nasugatan. Kundanaren na met ti panagusar ti rehimen nga US-Duterte iti dua a pasamak a panagbomba tapno ikalinteg ti panangpaatiddog iti linteg militar idia Mindanao.

Naikeddeng a malpas ti linteg militar idia isla ti Mindanao inton Disyembre 31. Ita pay laeng ket inwaragawag dagiti pasurot ken alyado ni Duterte iti panangpaatiddog iti daytoy a linteg. Inpangta met laeng ni Duterte ti panangipatungpal na ti *curfew* iti intero a pagilian.

Dakkel a kinaulbod ti ipilpilit ti pulis a karaman ti rebolusyonaryo a tignayan, partikular ti Bagong Hukbong Bayan (BHB), kadagiti dua a pasamak a panagbomba. Nairut apetpet ti BHB ti pannakasalaknib dagiti sibilyan ken maisupadi iti prinsipyo na nga ikabil dagiti sibilyan iti ania man a peggad.

Napasasamak dagiti nakaro pay a krimen ken ti panaglalsing iti karbengan-tao iti nagan ti linteg militar. Atiddog ti listaan dagiti kaso ti nasaknap a pammutbuteng ken panagpasurender kadagiti sibilyan, puerasaan a panagrekrut iti CAFGU, pananglipit ken pampapatay, militarisasyon ken aduan a panangitakder kadagiti detatsment iti nagan ti "kappia ken panagdur-as." Biktima met laeng dagiti sibilyan kadagiti "focused combat operation" a nagusar ti *rocket* ken bomba. AB

Napartak a panagkaro ti krisis iti ekonomya

Pumarpartak ti panagkaro ti krisis iti pagbiagan ti umili a Pilipino ken agsusuwek ti atrasado nga ekonomya ti Pilipinas iti uneg ti rehimen a Duterte. Umir-irteng ti sagsagraben da a panangidadanes ken pananggundaway babaen kadagiti neoliberal a patakaran nga agserserbi kadagiti dadakkel a lokal ken gangannaet a kapitalista, apo't daga ken burukrata kapitalista.

Iti rugi ti tawen, awanan-ressat ken napartak ti panagnagato ti presyo ti makan ken dadduma pay a basaran a kasapulan. Iti daytoy Agosto, ngimmato iti 6.4% ti implasyon, kapartakan a panagnagato ti presyo iti las-ud ti nganngani maysa a dekada. Nasakit met laeng iti bursa ti umili ti panagnagato ti presyo ti bagas. Agtultuloy met ti panagnagato ti presyo ti *diesel* ken dadduma pay a produkto a petrolyo.

Nasaknap met laeng ti disempleyo. Saan a bumaba iti 11 milyon ti awanan ken kurang ti trabahona. Iti sektor ti agrikultura, saan a bumaba iti 723,000 a pagbiagan ti naipakaammo a naawan idi Abril. Lalo a dumakdakkel ti baet ti sueldo dagiti mangmangged iti gatad a minimum a kasapulan para iti disente a panagbiag.

Husto a direkta nga idarum ti umili ni Duterte nga adda iti likud ti awanan-sarday a panagnagato ti presyo dagiti magatgatang gapu iti panangipataw kadagiti padagsen a buwis iti uneg ti linteg a TRAIN. Maisupadi iti kari na a 'narang-ay a biag,' pasig a nayon a padagsen ken pammarigat ti inpaay ti TRAIN, kasta met dagiti kissay iti subsidyo ken dadduma pay a patakaran ni Duterte. Intultuloy na laeng dagiti dati a programa ken patakaran dagiti naglabas a rehimen. Saan a baro ti idurduron na a "Build, Build, Build," laksid iti kalikagum na nga ikaten dagiti dati a pagannurotan a sigurado a mangted-dalan iti nasaknap a korapsyon. Kumarkaro ti krisis ti umili a Pilipino iti pagbiagan kagiddan ti agtultuloy a pannakaisadsad ti ekonomya ti Pilipinas. Manipud ti umuna a paset ti tawen,

nagparang dagiti pakakitaan nga agturong iti peggad ti nakaro a krisis ti ekonomya ti Pilipinas.

Ngumatngato ti depisito iti tagilakuan (\$19.1 bilyon iti daytoy umuna a guddua ti tawen, kadakkelan a guddua-tawen a depisito iti pakasaritaan), ti depisito iti balanse ti panagbayad (\$3.7 bilyon iti umuna a pito a bulan, agarup tallo a daras a dakdakkel ngem iti kapadana a panawen idi 2017) ken ti depisito ti gobyerno iti badyet (P279.4 bilyon, 36% a nangatngato kumpara iti kapada met laeng a panawen idi 2017).

Pilit a kalkaluban ti rehimen ken dagiti reaksyunaryo a teknokrata ti ramut ti krisis iti ekonomya. Saanda a maum-uma a mangibagbaga a 'natibker ti pundasyon' ti ekonomya, idinto a ti kinapudno na ket agruprupsa ti pinakabugas ti ekonomya ti Pilipinas. Lalo a mabuybuyok daytoy iti sango ti sangalubongan a kapitalista a krisis ken panagkamkamkam dagiti monopolyo kapitalista a manggamang ti ganansya babaen iti panangipatungpal kadagiti nakaro a porma ti panaggundaway.

Atrasado ken saan a makataker iti bukod ti lokal nga ekonomya. Ti lokal a produksyon ket iturtura-

yan dagiti gangannaet a kapitalista, a nakasentro iti sumagmamano a makunkuna nga 'economic zones.' Nakasanggir daytoy iti importasyon ken nakaturong iti panag-eksport. Saan a tumultulong daytoy iti panagdur-as ti lokal a kabaelan iti produksyon ken saan a makasungbat iti lokal a kasapulan. Dagiti gangannaet nga agpupuonan ket saan da a pagbaybayaden ti buwis iti pastrek ken dagiti makonkonsumo da a produkto wenno serbisyo. Maikususpil dagiti basaran a karbengan dagiti mangmangged tapno maipauneg da kadagiti nakaro a porma ti panaggundaway. Ti balor a maparpartuat dagiti mangmangged ket saan a makatulong iti panagdur-as ti lokal nga ekonomya nu di mairuar laeng iti internasyunal nga *assembly line* dagiti dadakkel a multinasyunal a korporasyon.

Ti lokal a rekurso ket gamgamruden dagiti dadakkel a gangannaet a kapitalista. Nalalawa a daga ti ag-agawen wenno maipaidam kadagiti mannalon ken minorya nga umili tapno gamgamen ti mineral a kinabaknang ken mausar kadagiti nalalawa a plantasyon dagiti mula a pang-eksport. Ginasgasut a ribu nga ektarya ti maipaidam para iti produksyon ti taraon para iti lokal a panagproseso ken konsumo. Atrasado ti lokal a produksyon nga agrikultural. Palalo nga agkurkurang ti pasilidad iti irigasyon ken dagiti makinarya para iti panagsukay, panagmula, panagapit ken panagkiskis. Nganngani awan ti subsidyo ti gobyerno iti agrikultura.

Maysa a nauneg a sugat ti krisis iti pagbiagan ti sagsagraben ti intero a pagilian iti agdama. Awanan serbi dagiti pangtapal nga addang ti rehimen kas iti panangted ti serbisyo ken dadduma pay. Sigurado ti panagirteng ti panaglaban ti umili kadagiti sumarsaruno a bulan. AB



Ibasura ti Bogus nga OLBARMM, sumampa iti BHB—MRLO

Nadagsen a kinundenar ti Moro Resistance and Liberation Organization (MRLO) ti kaipaspasa a linteg a Bangsamoro Organic Law (BOL), wenna ti maawawagan nga Organic Law for the Bangsamoro Autonomous Region in Muslim Mindanao (OLBARMM).

Segun kadakuada, naputar ti OLBARMM tapno allilawen ti umili a Moro. Ti panangited ti narabaw nga autonomya, ar-aramaten ti rehimen nga US-Duterte daytoy nga instrumento tapno pakapsuten ti dangadagiti umili a Moro bayat a ti mayorya kadakuada ket agsagsagrap iti nakaro a rigat ken kinaawan hustisya. Pinirmaan ni Rodrigo Duterte ti nasao a linteg idi Hulyo kalpasan a maikamakam a naipasa ti kongreso ken senado idi Mayo.

Segun ti MRLO, nasaknap ti kinarigat kadagiti lugar ti Moro ken sigurado nga agtultuloy daytoy a kasasaad iti babaen ti mabukel a Bangsamoro. Awan ti nailanad a probisyon iti OLBARMM maipapan iti panangipatungpal iti pudno a reporma nga agraryo, maysa kadagiti kangrunaan ken nasaknap a parikut dagiti mayorya a Moro. Imbes a reporma iti daga, ti maitakder a guberno ti Bangsamoro pay ti mangiyuna iti pannakabukel dagiti patakaran tapno mailukat dagiti ansestral a daga tapno gamruden dagiti gangannaet.

Napaneknekan daytoy iti napa-labas a panawen, iti babaen ti Autonomous Region in Muslim Mindanao (ARMM). Ipanpanakkel ti ARMM ti panagdur-as kano ti rehiyon bunga ti panagserrek dagiti kumpanya nga agminas iti *nikel* ken *mineral*, *quarry*, dagiti plantasyon ti *oil palm* ken *biomass renewable energy*. Ngem iti laksid dagiti maparnuay a trabaho, nangibunga met ti awan kapada a nakaro a rigat – dimmanon iti 60 porsyento iti kabuklan nga uppat a milyon nga umili nga agnanaed iti rehiyon ti naibilang a marigrigat.

Kakumplot dagiti agar-ari a dasig a Moro, ilaklako ti OLBARMM

kadagiti gangannaet a kumpanya ti kinabaknang ken rekursu ti rehiyon. Impaima na iti Malaysian Gas Petronas, kumpanya a US a nakabase idiy Malaysia ti bilyun-bilyon a gatad ti langis idiy Liguasan Marsh. Ilaklako na pay kadagiti multinasyonal a korporasyon ken kadagiti lokal a kumprador kas kenni Manuel Pangilinan ti Lanao Lake. Pakaruen pay dagiti kumpanya a UNIFRUITTI, Dole, Del Monte, La Frutera, Nestle, Mount Kalatungan Agri Ventures, Inc. ken dagiti kumpanya ti minas a manggamrud iti ansestral a daga ti probinsya ti Maguindanao, Basilan, Tawi-tawi, Sultan Kudarat, North Cotabato ken Lanao del Sur.

“Saan a nakaskasdaaw ti desisyon dagiti dadduma a lider ti MILF iti panangibbat iti armado a dangadag, adun kadakuada ti maibilangneng iti agdama nga agar-ari a dasig – agtagikua kadagiti nalawa a plantasyon ti saba ken *oil palm* idiy ili ti Sultan Kudarat, Sultan Mastura, Datu Odin Sinsuat ken Upi idiy Maguindanao. Ti dadduma met ket nakapatakder dan iti *mall*, hotel ken restoran idiy Cotabato ken Davao,” kuna ni Ka Jihad Al-Qursi, tagapagsarita ti MRLO.

“Gapu ditoy, nalakan nga isuko da ti armado a dangadag gapu ta isu da mismo ket agnumar iti OLBARMM, kabayatan a ti mayorya nga umili a Moro ket nailumlom iti kinarigat”.

Nayon pay ti MRLO, ti kinapudno, awan sarday dagiti operasyon militar ti rehimen nga US-Duterte kontra kadagiti umili a Moro uray pay iti tengnga ti pannakitungtong



na ti kappia iti MILF. Iti linged ti gubat laban iti Bangsamoro Islamic Freedom Fighters (BIFF), ti grupo a simmina iti MILF, nagtultuloy ti panagbomba idiy Liguasan Marsh idi panawen ti Ramadan. Gapu ditoy, nagbakwit ti 20,000 a pamilya.

Binurbor ni Duterte ti Marawi City a nagresulta iti panagbakwit ti 323,000, pannakadadael ti balbalay ken pasdek, ken pannakatay ti rinibribu a sibilyan. Iti tengnga ti “pannakinegosasyon” ti rehimen a Duterte, tinambakan na ti nasurok 30 batalyon nga AFP iti ARMM tapno pameken dagiti armado a Moro kas ti BIFF, MNLF ken MILF. Agtultuloy daytoy agingga iti agdama.

Kuna ni Al Qursi, awan ti rum-beng a rambakan dagiti umili a Moro iti pannakaipasa ti OLBARMM. Saan na a solbaren ti kiddaw ti umili a Moro para ti karbengan iti bukod a panggeddeng, kiddaw para iti hustisya ken panangirupir iti kontrol ti teritoryo ken ansestral a daga. Napaay ti OLBARMM a sungbatan ti kiddaw ti umili a Moro a sukayen ti bukod da a daga, gibusan

ti diskriminasyon kontra kadagiti Moro ken wayawaya kontra iti reaksyunaryo a rehimen nga idadauloan ni Duterte iti agdama.

Imbes a hustisya, papanawen ti rehimen ken sumagmamano a pamilya a Moro dagiti umili a Moro iti aniaman a pamuspusan. Kumaro a rigat ken bisin. Rinibu a Moro ti mapilitan nga agilako ti pigsat't tegged da iti nababa a balor tapno laeng makakaan kabayatan nga agak-akup dagiti korporasyon iti ganansya.

“Aw-awagan mi dagiti umili a Moro nga ituloy ti armado a dangadang iti laksid ti probisyon ti OLBARMM nga ibbatan ti BIAF ti armas na. Ti panagdekomisyon (panagsuko iti armas) iti BIAF ket taktika laeng ti rehimen nga ikatan kabaellan nga agsalaknib dagiti komunidad ti Moro kontra iti puersa ti estado ken dagiti korporasyon nga agpanggep a gamruden ti anestral a daga ken kinabaknang ti Bangsamoro”, kuna ni Al Qursi. Ti BIAF (Bangsamoro Islamic Armed Forces,) ti nakatakder nga armado a puersa ti MILF.

Iyaw-awis met ti grupo dagiti pada da a Moro nga agkameng iti Bagong Hukbong Bayan, ti pudno a soldado ti umili a Pilipino ken Bangsamoro. Silulukat met ti MRLO a makitinnulong kadagiti elemento ti MILF, BIFF ken daduma pay a grupo ti Moro tapno iyabante manen ti armado a panakidangadang inggana magunod ti wayawaya iti kontrol ti imperyalista a US, pyudalismo ken burukrata kapitalismo. Makikaysa ti umili a Moro iti rebolusyonaryo a dangadang tapno magunod ti nailian a demokrasya.

Kuna pay ni Al Qursi, “napanekekan ti pakaisaritaan a saan a magunod ti bukod a pannakawayawaya ken bukod a pangngedeng babaen iti tungtongan iti kappia iti reaksyunaryo nga estado. Magunod laeng ti pudno a hustisya ken wayawaya babaen iti armado a pannakidangadang”. AB

Martsa dagiti mangmanged, nairussuat

INRUSSUAT TI NADUMADUMA nga unyon ken asosasyon dagiti mangmanged, kakuyog dagiti tao ti simbaan ti “Martsa dagiti Mangmanged” idi Agosto 27, a nagtulong iti rangtay ti Mendiola idia Maynila. Kiniddaw da ti pananggibus iti kontraktualisasyon ken pananglaban iti agsusuek a kasasaad ti pagbiagan dagiti mangmanged ken umili.

Iti panangiyun-una ti Kilusang Mayo Uno (KMU) ken ti Church-Labor Conference nga idadauloan ni Manila Auxiliary Bishop Broderick Pabillo, nakilaok ti agarup 20 nga organisasyon ken mano a ribu nga umili iti martsa. Kabayatanna, idia Davao City, naigiddan a panagtignay ti nairussuat iti panangiyun-una ti Samahan ng mga Manggagawa laban sa Kontraktualisasyon (SAMA AKO). Naaramid met dagiti kapada na a protesta kadagiti syudad ti Cebu ken Bacolod idia Visayas.

Kabayatan na, inkasa ti nasurok 300 a mangmanged ti Liwayway Marketing Corporation ti welga da idi Agosto 24 kalpasan ti panagkedked ti maneydsment a denggen ti

nainkalinteg a kiddaw da a pagbalinen a regular dagiti kontraktual a mangmanged.

Nakapauneg iti uppat a kontraktor dagiti mangmanged nupay 15 tawen dan nga agrabtrabaho iti panagaramid kadagiti produkto ti Oishi (dagiti saramsam a makan).

Kagiddan daytoy, agplanplano nga agwelga dagiti superbisor ti PLDT gapu iti palalo a panagpatrabaho ti kumpanya kadakuada a nangibunga ti madi iti salun-at da. Kalpasan ti nasaknap a panangikkat ti kumpanya iti 12,000 a kontraktual, naipasa kadagiti superbisor ti amin a trabaho da. Sibubukel ti supporta dagiti naikkat a mangmanged kadagiti superbisor. AB

Panangsubli iti anestral a daga dagiti Manobo

INDAULOAN TI KASILU (Kaugalingong Sistema Igpasasindog to Lumadnong Ugpaan) ti 3,000 a Manobo a nagkaykaysa a nangsakop ken nangsukay ti 200-ektarya a daga idia Barangay Cawayan, San Fernando, Bukidnon idi Setyembre 4. Daytoy a daga ket inagaw da Paquet Albona, Toto Espidoza ken Bennie Elumba.

Lima a dekadang ti napalabas idi maagaw kadagiti Manobo iti anestral a daga da. Manmano ti mabisinan da idi gapu ta adda naan-anay a taraon talon da. Nakairuaman da ti sistema a “hunglusay” wenno agtitinnulong iti panagtalon. Iti met laeng anestral a daga da a maala dagiti agas para kadagiti sakit, nadalus a danum ken dagiti ramit para iti panagitakder ti balalay.

Segun kenni Datu Amas, sekretarya ti KASILU idia San Fernando, “ba-baen laeng ti nagkaykaysa a panagtignay a masubli ti anestral a daga mi.”

Dagiti limmaok iti panagtignay ket naggapu iti 12 a komunidad dagiti Manobo manipud barangay Magkalungay, Cawayan ken Poblacion.

Idia met Norzagaray, Bulacan, nangirussuat met kolektibo a panagsukay ti agarup 60 a pamilya ti mannalon iti paset ti 75 ektarya idia Barangay San Mateo nga ag-agawen ti Royal Mollucan, maysa a kumpanya iti *real estate*. Dagiti a mannalon ket kameng iti Samahan ng mga Magbubukid sa Compra ken manipud Setyembre 1 ket nagmula dan kadagiti saba, pagay ken natnateng.

Idi Setyembre 6, sinerrek dagiti armado a puersa ti Royal Mollucan ti pagsuksukayan ken dinadael da dagiti mula a pagay, prutas ken natnateng, mairaman dagiti sapaw dagiti mannalon. Nasapsapa pay, idi Setyembre 3, pinutokan dagiti guardya ti kumpanya dagiti mannalon nga agmulmula. AB

DAGITI PROTESTA TI UMILI

IDIAY BACOLOD CITY, nagkampo ti 1,500 a kameng ti Kalipunan ng Damayang Mahihirap (Kadamay)-Negros idi Agosto 30 iti sango dagiti abandonado a pabalay ti gobyerno idiy Barangay Felisa, Bacolod City.

Nabayagen nga iruprupir ti Kadamay iti National Housing Authority a maited dagitoy a balay kadagiti nakurapay. Segun kenni Berlita Ante, Secretary General ti Kadamay-Negros, saan da a serreken dagiti pabalay inggana a maiyangay ti tungtongan iti baet ti Kadamay ken Bacolod NHA. Kabayatanna, agtultuloy dagiti protesta tapno maisigurado a maaddaan ti dayalogo.

Kontra-terorismo. Rimmaut ken nagprotesta ti nadumaduma a grupo dagiti nailian a minoritya iti Manila Regional Trial Court idi Agosto 31 kagiddan ti panangidatag ti mosyon tapno ikkaten ti nagan dagiti lider-minorya iti listaan dagiti terorista iti maysa a kaso nga inpila ti Department of Justice.

Limmaok iti panagtignay ti nadumaduma a grupo dagiti nailian a minoritya. Kinundenar da ti agtultuloy a panagarestar ken panangibalud kaddagiti lider-minorya iti pagilian a dimmanonen iti 170 indibidual.

Panangsalaknib kadagiti eskuelaan. Nagprotesta ti Save our Schools Network (SOS) ken Salinlahi Alliance iti sango ti kongreso idi Agosto 28 kagiddan ti panangdengngeg iti badyet ti Department of Education.

Kiniddaw da ti pannakairuar dagiti permit para kadagiti eskuelaan ti Lumad ken kinundenar da iti panangipalubos ti DepEd iti kaadda dagiti soldado iti eskuelaan da. Idi Setyembre 3, naitakder manen ti “Eskwelaan ti Bakwit” idiy Metro Manila a nagawit iti isyu ti militarisasyon ken pananglipit ti rehimen a Duterte kadagiti eskuelaan ti Lumad. AB

Militar ken pulisya, mangdidigra iti pagilian

Tallo a kameng ti maysa nga organisasyon ti mannalon idiy Compostela Valley ti nagsasaruno a pinatay dagiti tao ti estado iti daytoy Agosto iti uneg ti agtultuloy a nakabutbuteng a linteg militar idiy Mindanao. Iti daduma pay a paset ti pagilian, agar-ari met ti pamutbuteng dagiti dadduma pay a yunit ti militar ken pulis.

Pammapatay. Idi Agosto 18, banda alas-10:30 ti rabii idiy Compostela Valley, pinaltogan ken pinatay dagiti elemento ti 66th IB ni Rolly Panebio, aktibo a kameng ti Compostela Farmers Association (CFA). Kailepleppas laeng ni Panebio ti trabaho na kas boluntir nga istap iti seguridad ti Salupongan Ta Tanu Igkanugon Community Learning Center idiy Barangay Bango idi simmangpet ti dua a lalaki a naglugan iti motorsiklo. Inyadayo dagiti lallaki ni Panebio iti mano a metro idiy eskuelaan ken idiy da a pinaltogan.

Kabigatanna, pinatay met dagiti elemento ti 66th IB ti agassawa a Gilbert ken Jean Labial, agpada a kameng ti CFA. Naggapu ti agassawa iti massayag ni Panebio idi makita ni Gilbert ti dua a lalaki nga agur-uray iti asideg ti kampo ti 66th IB idiy Sityo Balite, Barangay Banakon ti nasao nga ili. Insubli ni Gilbert ti motorsiklo na ngem kinamat dagiti ken pinaltogan dagiti kriminal.

Da Panebio ken ti agassawa a Labial ket aktibo a limmaban iti panagminas ken militarisasyon idiy lugar da. Siguden a pabpabasolen dagiti soldado ida kas kameng ti Bagong Hukbong Bayan (BHB) ken puersado a pinasurender idi Pebrero ken Marso.

Idiy Negros Oriental, pinaltogan agingga a matay ni Heide Malalay Flores idi Agosto 21, pasado alas-6 ti rabii idiy Poblacion, Guihulngan City. Ni Flores ket maysa a dati nga aktibista ken mabigbig a managtulong iti umili lalo kadagiti marigrigat a mannalon. Idi 2017, ni Flores ket pinangtaan ti grupo a *vigilante* a Kawsa sa Guihulnganon Batok Druga ug Komunista kalpa-

san ti naballigi nga ambus ti BHB laban iti PNP.

Idiy Cebu, napatay babaen ti pammaltog ni Butch Rosales, 42 idi Agosto 8, maysa a mangsalsalaknib iti karbengan-tao ken boluntir ti Rise Up Cebu. Ni Rosales ket nakalugan iti saguanan ti dyip a mapan idiy Punta Engaño, Lapu-lapu City idi paltogan ti suspek, a nakatugaw met iti likudan na. Naglibas ti kriminal a naglugan iti agur-uray a motorsiklo.

Idiy Pangasinan, ti menor de edad a ni Joshua Laxamana ket pinatay dagiti elemento ti PNP Regional Office I bayat nga agbibiyahhe agturong iti Tarlac City kakuyog ti gayyem na a ni Julius Sebastian, 15. Naggapu ti aggayyem idiy Baguio City a nakisalaliti iti DOTA (ay-ayam iti kompyuter). Naudi a nakita da idiy Sison, Pangasinan idi Agosto 16 nga agur-uray ti lugan. Kabigatanna, inpadamag ti PNP a napatay da kano ni Laxamana idi “limmaban” daytoy. Pinabasol pay ti PNP ti menor de edad a karaman kadagiti kaso ti panagtakaw idiy Pangasinan, addaan awit a paltog ken shabu, ken naglibas iti tsek-poynt a nakalugan iti motorsiklo. Ni Sebastian ket saan pay laeng nga inruar ti PNP.

Gandat a panangpatay. Ginandat a patayen dagiti armado a lalaki ni Victor Ageas, lider ti Nagkahiusang Mamumuo sa Suyapa Farms-Kilusang Mayo Uno (NAMASUFA-KMU) idiy Compostela, Compostela Valley idi Setyembre 4, banda alas-6 ti agsapa. Segun mismo kenni Ageas bayat a nakamotorsiklo a mapan iti trabaho na ket sinurot ti uppat a lallaki a nakamotorsiklo ken sinabat ti uppat pay iti kawatiwatan ti Crossing

Blanco. Idi dua a metro laengen ti kaadayo ni Ageas kadagiti suspek ket pinaltogan da.

Itudtudo ti KMU a motibo ditoy ti plano ti NAMASUFA nga agirusat ti welga laban iti Sumifru gapu iti panangiyalang-aleng ti kumpanya iti CBA wenna *collective bargaining agreement* nga idadauloan ti unyon.

Iligal a panag-arestar. Idi Setyembre 2, tallo a mannalon ti inarestar dagiti soldado ti 2nd ID a nakakampo iti tengnga dagiti balbalay idiy Barangay Calumpit, Lobo, Batangas. Segun iti Kilusang Magbubukid ng Pilipinas, naarestar da Marwin de Rafael, Santi Ticatic ken Joselito Flores ken nakabalud iti PNP-Lobo iti agdama. Nainget a lablabanan ti umili ti Lobo ti plano a panangitakder ti kumpanya ti minas iti ili.

Naaramid ti iligal a panagarestar iti pareho nga aldaw kalpasan ti panagdependa ti BHB-Batangas laban iti atake ti 1st IB idiy Sityo Silyaran ti nasao a barangay. Pina-bettakan ti bomba ken pinaputokan ti riple ti BHB dagiti tropa ti militar a nagresulta iti mano a kaswalti iti benneg da.

Idi Agosto 11, ni Arnold Albarillo ket inarestar ti dua a nakasibilyan a pulis idiy Barangay Calsapa ken inpan da iti kampo ti Provincial Public Safety Battalion idiy Barangay Tacligan, San Teodoro, Oriental Mindoro. Naipauneg iti dua oras nga interrogasyon sakbay nga inpan iti PNP San Teodoro. Nabalud gapu kadagiti parparbo a kaso ti panagpatay, gandat a panagpatay ken rebelyon.

Ni Albarillo ket naggapu iti pamilya a nabayagen a lipipiten ti estado. Ti nagannak ken inauna a kabsat na ket biktima ti tortyur ken pinatay ti militar. Idi Abril 2002, iti uneg ti nadangkok a panangidaulo ti dati a Col. Jovito Palparan idiy Mindoro, inakusaran a kameng ti BHB ken pinatay dagiti nagannak na a da Manuela ken Expedito, coordinator ti Bayan Muna idiy a panawen. Idi 2012, ni Armando

Albarillo a manong na ken dati a pangkabuklan a kalihim ti Bayan-Timog Katagalugan ket pinatay ti 74th IB.

Kabayatanna, idi malem ti Agosto 15, iligal nga inarestar dagiti pulis ni Mylene Santua, dati a tagapagsarita ti grupo a Coco Levy Fund Ibalik sa Amin (CLAIM), idiy Barangay Pagsangahan, San Francisco, Quezon. Kidkiddawen ti CLAIM nga isubli kadagiti agniniyog ti nasurok P200 bilyon a pondo ti *coco levy*. Masikog ni Santua ken agpakonsulta koma iti doktor idi matiliw. Nakabalud idiy Barangay Malamig ti nasao nga ili iti agdama.

Panagbomba. Nangted ti nakaro a buteng kadagiti estudyante ti Salupongan Ta Tanu Igkanugon Community Learning Center ti panagbomba ti 10th ID idiy Barangay Dagohoy, Talaingod, Davao del Norte idi Agosto 27. Binomba ti Philippine Air Force iti asideg ti eskuela nu sadino ket madama ti klase dagiti ubbing.

Militarisasyon. Idiy Isabela, inokupar ti 54th IB ti Barangay Sta. Isabel, Jones manipud pay idi Hulyo. Indauloan ti maysa a Lt. Amilao ti panangiyaramid ti operasyon a “community support program” iti uneg ti Oplan Kapayapaan. Resulta daytoy, nadumaduma ti naipakaammo a panaglabsing iti karbengan-tao, maibilang ti puersado a panagserrek ken iligal a panangrikisa kadagiti balbalay, panangdadael kadagiti pagmulaan, panagtiktik ken panangakusar kadagiti residente a kameng wenna tagasuporta ti BHB. Nangipataw met laeng dagiti soldado ti *curfew*. Malaksid iti 54th IB idiy Jones, agop-operasyon met laeng ti 86th IB ken 95th kadagiti ili ti San Agustin ken San Guillermo.

Idiy Negros, nakaro ti panaglabsing ti 303rd IBde iti karbengan dagiti umili ti isla manipud idi maifestino ti 15th IB ken 94th IB idiy iti umuna a kwarto ti tawen. Malaksid pay ditoy ti panangdidigra ti 62nd IB iti dadduma nga ili ti isla.

Ti 303rd IBde ket idadauloan ni Col. Alberto Desoyo.

Agtultuloy ti operasyon militar ti 15th IB idiy Abagatan a Negros, partikular kadagiti ili ti Hinobaan, Ilog, Candoni, Sipalay City ken Baysay manipud pay idi Marso. Segun kenni Ka Juanito Magbanua ti BHB-Negros Island, dagiti operasyon ti 15th IB ket agserserbi kas panagsagana iti panagsanay-militar a Balikatan a maiyangay inton Oktubre. Kadagiti igid-baybay a barangay ti Asia ken Sangke, ken iti nagbeddeng ti Hinobaan ken Ilog, minandaran dagiti soldado ti umili a dadaelen ken panawan dagiti balay da iti kataltalonan.

Maibilang met laeng kadagiti krimen ti 15th IB ti panagbugbog ken puersado a panagpaigiya kadagiti uppat a mannalon; panagtiktik ken panangtarget kadagiti residente nga inlista ti militar kas kameng wenna tagasuporta ti BHB; panangdadael kadagiti taltalon, mula ken apit; panangiparit kadagiti residente a mapan kadagiti talon da; ken panangibulos kadagiti dinguen a makagapu iti pannakatay ti mano kadagitoy.

Idiy Central Negros, makayup nga inatake ti nasurok 100 soldado ti 94th IB dagiti syudad ti Guihulungan ken Canlaon, ken dagiti ili ti Magallon (Moises Padilla) ken Isabela. Nayon pay ti BHB-Negros, agpampamarang a Nalabbaga a mannakigubat dagiti elemento ti 94th IB ken pilit a sumrek kadagiti balbalay ken mangbutbuteng kadagiti residente. Gapu ditoy, dagiti bumaryo ket saan a makapan kadagiti talon da.

Nganngani lima a bulan meten nga inokupar ti 62nd IB ti dua a barangay idiy Mabinay, dua pay idiy Manjuyod, ken dadduma pay idiy Ayungon. Us-usaren dagiti soldado a kas pagkampan dagiti *barangay hall* ken dadduma pay a pang-sibilyan nga imprastruktura, puersado a ser-serreken ti balay dagiti residente ken paspasurenderen ida kas kameng ti BHB.

Krisis iti bagas ken taraon, maus-usar para iti todo a liberalisasyon

Numanpay maysa nga agrikultural a pagilian ti Pilipinas, iti agdama ket numir-irut ti barikes dagiti Pilipino gapu iti agtultuloy a panangngato ti presyo ken nairut a kontrol ti dadakkel a kapitalista iti suplay ti bagas, ikan ken dadduma pay a basaran a taraon.

Manipud 2017, ngimmato ti presyo ti bagas iti abereyds a 10% segun iti datos ti reaksyunaryo a gubyrno. Idi napalabas a bulan, naiduron nga ideklara ti *state of calamity* idia Zamboanga City kalpasan a ngimmato iti P70-P80/kilo ti presyo ti bagas iti syudad.

Kagiddan met laeng daytoy a ngimmato dagiti presyo ti galunggong (P160-P200/kilo, nangatngato ti P20-P60 ngem iti abereyds a presyo iti pagtagilakoan), tilapia (P130/kilo, nangatngato ti P30) ken bangus (P180/kilo, nangatngato ti P30).

Ibilbilang ti rehimen ti krisis ti taraon kas maysa kadagiti kangrunaan a salik nu apay a timmayok ti implasyon iti 6.4%, ti kangatoan a nailista iti uneg ti siyam a tawen.

Ngem imbes nga iduron ti panangpapigsa ti lokal a produksyon segun iti prinsipyo ti seguridad ken soberanya iti taraon ken agrikultura tapno supusopan ti nasao a krisis, isu ti irasrason ketdi dagiti upisyal ti rehimen iti ekonomya ken ni House Speaker Gloria Macapagal-Arroyo tapno iduron ti nalawlaw a panangngat kadagiti agrikultural a produkto segun kadagiti annuroten ti World Trade Organization (WTO).

Iti partikular, ipuspuslit da ti panangipatungpal kadagiti annuroten a lalo pay a mangdistrungka kadagiti restriksyon iti panangngat ken mangguyod pababa kadagiti taripa (buwis iti maangkat a produkto).

Maikamkamakam iti agdama a mapagbalin a linteg ti Rice Tariffication Bill a naan-anayen a mangikkat iti kantitatibo a restriksyon (wenna panangikeddeng ti mapalubosan a kaadu) iti panangngat ti bagas ken imbes ket mangipataw

laengen ti 35% a taripa daytoy ken maikeddeng pay a maguyod iti nababbaba a tukad kadagiti sumarsaruno a tawen. Inpatungpal met ti Department of Agriculture idi napalabas a bulan ti Fisheries Administrative Order 195 a mangipalubos iti panangngat ti 17,000 metriko tonelada (MT) a galunggong.

Gakat a neoliberal

Iti uneg ti rehimen ni Ramos idi 1995, induron ti dati a Senador Arroyo ti panangpirma ti Pilipinas iti Agreement on Agriculture (AOA) ti WTO. Maisurot iti AOA, obligado ti Pilipinas a todo nga ilukat ti pagilian iti panangngat kadagiti agrikultural a produkto ken panangikeddeng iti nababbaba a taripa. Niratipika ti Senado ti AOA babaen iti panangipasa ti Agricultural Tariffication Law.


Iti bangir daytoy, saan a dagus a naipatungpal ti todo a liberalisasyon ti bagas gapu iti nairut a panangsuppiat ken pananglaban ti umili. Iti sango dagiti dadakkel a protesta, naiduron ti reaksyunaryo a gubyrno a mangala ti sangapulo

a tawen nga ekstensyon sakbay a distrungkaen dagiti kantitatibo a restriksyon iti bagas.

Numanpay nagtalinaed ti taripa ti bagas iti 50%, obligaren ti WTO ti pagilian nga aglukat iti *minimum access volume* (MAV wenna minimum a kaadu) iti panangngat ti bagas. Inlimitar laeng iti 3% ti kabuklan a lokal a produksyon ti MAV, ngem iti aktwal ket sobra ditoy ti kaadu ti maangngat a bagas.

Idi nagkiddaw manen ti ekstensyon ti reaksyunaryo a gubyrno idi 2004 ken 2012, nangipataw manen ti WTO kadagiti bangking a kundisyon iti tagilakuan. Iti maikadua nga ekstensyon, naipababa ti taripa ti bagas iti 40%, ken manipud 40% inggana ti 35% kadagiti imported a karne. Iti maikatlo nga ekstensyon, naipangato iti 7% ti MAV ken naipababa iti 35% ti taripa iti bagas. Naipababa met ti taripa ti karne, lalaem ti baboy ken manok ken dagiti produkto a gatas.

Iti agdama, Pilipinas laeng ti kameng a pagilian ti WTO nga adaan pay nabatbati a kantitatibo a restriksyon iti panangngat. Gungundawayan ti rehimen itatta ti panagtayok ti presyo dagiti produkto a taraon tapno ikalinteg ti todo a liberalisasyon iti panangngat ti bagas ken galunggong iti lokal a pagtagilakuan.



Killo a lohika

Pinaneknekan ti Ibon Foundation a saan a pudno ti lohika a mapatibker wenno bumaba ti presyo ti taraon babaen iti nayon a panagimport.

Inlawag daytoy nga adda dagiti tawen a nangato ti panagangkat ngem agtultuloy latta ti panagtayok ti presyo. Kas pangarigan, tallo a tawen sakbay a napasas a ngimmato ti presyo iti P7.99 tunggal kilo idi 2008, tinawenen nga agang-angkat ti pagilian ti abereyds a 1.8 milyon MT. Idi 2008-2010, tinawen nga agangkat ti pagilian ti abereyds a 2.2 milyon MT, ngem nagtultuloy a ngimmato ti presyo ti bagas iti abereyds a P1.20 tunggal tawen aginggana 2016.

Awan met regulasyon ti guberno iti presyo ti angkaten a bagas no ilako daytoy iti lokal, nayon ti Ibon. Adun a gundaway iti napalabas a saan a makagiddan ti lokal a presyo, aglalo ti presyo ti naatado—iti garaw ti presyo iti sangalubongan a pagtagilakuan. Adda dagiti panawen a bayat nga agpababa ti garaw ti sangalubongan a presyo ti bagas, agpangato met iti lokal. Dakkel ti akem ditoy dagiti komersyante a mangkonkontrol iti suplay ken presyo ti bagas ken panagkedked ti guberno nga aywanan ti interes ti aggatgatang laban iti sobra a panagngato ti presyo.

Nalawag a dagiti programa ti rehimen nga US-Duterte iti panagangkat ket pangallilaw laeng tapno iduron ti liberalisasyon kadagiti subsektor ti agrikultura nga addaan pay nabatbati a proteksyon, segun iti diktat ti WTO. Pammaneknek laeng daytoy nga awan ti plano ti reaksyunaryo a guberno a papigsaen ti lokal nga agrikultural a produksyon ken imbes ket agtultuloy laeng a parimbawen dagiti neoliberal a katulagan iti tagilakuan a nabayagen nga us-usaren dagiti imperyalista tapno igalut ti Pilipinas iti dominasyon da.

AB

Dagiti sibilyan, minasaker dagiti pasista a tropa ti India

Sangapulo ket lima a sibilyan ti minasaker dagiti pulis ti India idi Agosto 6 iti baryo ti Nulkatong idia ili ti Sukma, Chattisgarh. Tapno kaluban ti krimen, inparang dagiti pulis nga armado ken kameng ti milisyang bayan ti Communist Party of India (CPI) – Maoist dagiti nasao a sibilyan. Pinaneknekan dagiti kakabagyan ken kabaryoan dagiti biktima a saan a pudno daytoy.

Idi Agosto 8, kinasoan ti grupo a mangsalaknib ti karbengan-*tao* dagiti nagbasol a pulis.

Segun kadagiti pulis, nakipin-naltog dagiti sibilyan ken nakumpiska da pay kano ti 13 a nababa ti kalibre na nga armas manipud iti nakapasamakan. Binadoan da pay ti uniporme a komoplahe ti maysa kadagiti napapatay nga agtawen ti 14 a ni Muchaki Muka. Ipanpanakkel ti reaksyunaryo nga estado ti India ti masaker kas “kadakkelan nga operasyon” laban kadagiti Naxalista (pangawag kadagiti Maoista idia India) iti estado ti Chattisgarh. Ti Chattisgarh ket paset ti makunkuna a “Red corridor,” lugar a napigsa ti presensya ti CPI-Maoist ken ti armado a hukbo daytoy, ti People’s Liberation Army.

Ngem segun iti imbestigasyon ti Scroll.in, maysa nga independyente a midya idia India, matmurog ti 30 katao ti maysa a “*kheta*” wenno “ladi”, kalapaw a pagyanan dagiti manalon iti panawen ti panagtagatalon ken panagaapit idi pinaputokan dagiti pulis. Iti 15 a napapatay, uppat ti menor de edad. Uppat ti naarestar, maysa ti nakaro a nasugatan bayat a nakalibas ti dadduma. Iti listaan nga inruar ti CPI-Maoist, awan ti uray maysa kada-kuada ti kameng ti hukbo wenno milisya. Pinaneknekan ti imbestigasyon mismo dagiti pulis a “sumagmamano” kadagiti biktima ket saan a Maoista.

Saan laeng a dagiti kabagyan dagiti biktima ti mangpaneknek, ngem uray dagiti kabaryoan da, a sibilyan dagiti minasaker dagiti pulis. Maibilang ditoy dagiti tallo nga

agkakasinsin a menor de edad, a kimmuyog laeng kadagiti amma ken uliteg da. Kinapudno na, dua laeng ti maturog koma idia *kheta* iti daydiay a rabii. Immadu da laeng idi nagrugi ti operasyon dagiti pulis idia Nulkatong ken kadagiti kabangibang a baryo.

Segun pay kadagiti kabagyan dagiti biktima, nagan ti 30 a sibilyan iti nasao a *kheta* tapno liklikan ti panagabusog dagiti pulis a nagrugi nga nagoperasyon idia Nulkatong ken kabangibang a baryo idi rugi pay laeng ti Agosto. Masansan nga arbitrario nga ibalud ken bugbogen dagiti pulis dagiti residente a lallaki no sumrek dan iti lugar. Takawen da met ti bagas ken manok dagiti bumaryo.

Iti mainaig a damag, umad-*adu* dagiti organisasyon iti uneg ken ruar ti India a lumablaba kenni Nahendra Modi, dadaulo a ministro ti pagilian, iti insayangkat na a *crackdown* kadagiti aktibista tapno pameken dagiti lehitimo a protesta laban kadagiti patakaran ti rehimen na.

Nagisayangkat ti serye ti reyde ken panagarestar ti pulis ti India iti innem nga estado laban kadagiti lider ti komunidad, uray dagiti mabigbig nga intelektwal idi Agosto 28. Inarestar ken inbalud daytoy da Sudha Bharadwaj, abugado ken mangsalsalaknib ti karbengan-*tao*; Varavara Rao, mabigbig a mannurat ken mannaniw ken ti dua nga anak na a babai a da Anala ken Pavana; Arun Ferreira, mannurat ken aktibista; reporter ken aktibista a ni Gautam Navlakha; Vernon Gonsalves, mannurat ken aktibista; Stan

Swamy, padi ti Katoliko ken aktibista; Anand Teltumbde, propesor ken maysa a deadal; K. Satyanarayana, propesor; KV Kurmanath ken Kranti Tekula, dagiti peryodista; ken Jiten Yumnam, peryodista ken mangsalsalaknib ti karbengan-tao. Naarestar da iti suspetsa a mairaman da iti pinarbo nga istorya ti plano nga asasinasyon kenni Modi ken panangidaulo kano iti protesta idi napalabas a tawen tapno suportaran dagiti Adivasi, ti kolektibo a pangawag kadagiti kababaan ti saad na iti gimong ti India. Naakusaran da met a sumupsuporta iti CPI-Maoist ken ti armado a hukbo daytoy, ti People's Liberation Army, a kangrunaan a nakabase iti lugar dagiti Adivasi.

Dumanon iti 12 nga organisasyon manipud idia India, Nepal, Germany, Bangladesh ken Pilipinas ti nagpirma iti petyisyon tapno ibasura dagiti pinarbo a kaso laban kadagiti aktibista ken dagus a mawayawayaan da.

Agpanawagan met idi Agosto 17 ti ILPS-Canada a dagus ken awan kondisyon a mawayawayaan da G.N. Saibaba, maibilang ti "India 5" ken amin a politikal a balud idia India kanaig iti maika-72 a tawen ti pannakawayawaya ti India.

Ni Saibaba ket natan-ok a propesor ti literatura idia Delhi University. Ti lima nga aktibista met ket napinget a mangsalsalaknib ti karbengan-tao, aglalo dagiti Adivasi. Naarestar da idi Hunyo 2017.

Nahusgaan ni Saibaba iti daydiay met laeng a tawen ti tungpal biag a pannakaibalud, kadua na da Hem Mishra, Prashant Rahi, Makesh Tirki ken Pandu Norote. Naakusaranda nga adda ti pakainaigan da kadagiti Maoista. Nakabalud ni Saibaba itatta iti notoryus a pagbaludan ti Nagpur iti laksid ti kumarkaro a sakit na. AB

Dagiti grupo a progresibo idia Colombia, nagtaripnong

NAGTARIPNONG TI LIMA a progresibo a grupo idia Colombia tapno itakder ti nalawa a demokratiko ken anti-imperyalista a prente iti uneg ti International League of People's Struggle (ILPS) idi Agosto 10-11.

Segun kenni Prof. Jose Ma. Sison, mangidadaulo ti International Coordinating Committee ti ILPS, napapanawen ken umangatop ti panangisayangkat ti asembliya iti uneg ti tema para iti panggimong a hustisya aglalo kalpasan nga insuko ti FARC (Fuerza Armada Revolucionario de Colombia) ti armado a pannakidangadang kasukat ti sumagmamano a konsesyon iti pulitika manipud iti reaksyunaryo nga estado ti pagilian. Kuna ni Sison, awan pagbanagan ti napirmaan a katulagan iti baet ti FARC ken ti guberno ti Colombia, ken saan a magun-od ti panggimong a hustisya aginggana a nakapauneg ti pagilian iti panagari ti imperyalismo nga US ken bayat a kumarkaro ti panangidadan ken pananggundaway dagiti agar-ari a dasig ti Colombia iti umili. Simrek ti FARC iti pinal a katulagan para iti panangibaba ti armas idi 2016, kasukat ti tallo a puesto iti parlamento ken amnestiya para kadagiti mannakigubat daytoy.

Segun pay kenni Prof. Sison, dagiti progresibo a grupo a nagtaripnong ti adda iti pusisyon tapno usigen ti pakasaritaan ken ilanad ti agdama a kasasaad ti umili ti Colombia. Panawen itatta ti nairteng a kumpetisyon a pang-ekonomya ken ribalan iti pulitika iti intar dagiti imperyalista a poder ken umirteng a panangidadan ken pananggundaway da iti umili ti lubong, kuna ni Sison. Gapu iti akikid a managimbubukod nga interes, idurduron da met laeng ti proletaryado ken umili nga agbaringkuas ken wayawayaan ti bukod da.

Partikular idia Latin Amerika, a nakapaunegan ti Colombia, us-usaren ti US dagiti alyado ken tao daytoy iti beneg ti pulitika ken ekonomya tapno ikuspil ken parme-

ken dagiti anti-imperyalista, demokratiko ken rebolusyonaryo a puersa ken umili. Kagiddan daytoy, laplappedan met ti US ti panagserrek ti puonan ti China iti maysa a rehiyon a kaasitgan ken nabayagen a maibilbilang a likudan. Iti laksid daytoy, napigsa ti panaglapan dagiti pagilian ditoy, kas iti Cuba ken Venezuela, laban iti pannakibiang ken interbensyon ti US. Namnamaen nga umirteng pay dagiti panangipataw ti panagari na idia Latin America, segun kenni Sison.

Iti kasta, rumbeng a nakasagana met dagiti progresibo a grupo a palawaen ken pairtengen ti nadumaduma a porma ti panaglapan iti baet ti US ken umili ti Latin America. "Iti sumaruno a lima aginggana sangapulo a tawen, agbalin tayo a saksi iti awan kapada a panagbettak dagiti labutab ti ekonomya ken pulitika ti sangalubongan a sistema ti kapitalista ken ti awan kapada a pananggato iti tukad ti panaglapan ti umili," nayon pay ni Sison.

Ti ILPS-Colombia ket bukuklen ti La Corporacion para Investigacion y la Educacion Popular, El Movimiento por la Defensa de los Derechos del Pueblo, El Movimiento por la Constituyente Popular, el Colectivo Nacional Sindical Clasista "Guillermo Marín" ken Organizacion de Mujeres del Pueblo de Colombia.

Iti agdama ket paset ti ILPS-Colombia iti 200 a kameng ti organisasyon iti 40 a pagilian iti lima a kontinente nga agtultuloy iti panangpapigsa ti panagkaykaysa, tinnulong ken koordinasyon kadagiti anti-imperyalista ken demokratiko a pannakidangadang iti intero a lubong babaen iti dimmakel a panagtignay kadagiti 17 a multi-sektoral nga isyu. AB